

Sekretarijat Energetske zajednice i predstavnici Federacije BiH (FBiH) prekinuli su pregovore oko planirane izgradnje elektrane Blok 7 u Tuzli.

U saopćenju za javnost Energetske zajednice navodi se kako su pregovori postali uzaludni, a nakon što je ministrica finansija FBiH 19. novembra 2019. godine potpisala ugovor o garanciji bez prethodnog pojašnjenja poštivanja pravila Energetske zajednice o državnoj pomoći.

Na zahtjev Federacije BiH, Sekretarijat Energetske zajednice je 31. jula 2019. pristao istražiti mogućnosti za rješavanje spora s BiH u vezi s državnom garancijom koju je u ime FBiH izdalo Federalno ministarstvo finansija.

Garanciju osigurava kredit Izvozno-uvozne banke Kine javnom preduzeću Elektroprivreda BiH d.d. Sarajevo, i preduslov je pomoći za izgradnju Bloka 7 u Tuzli.

Sekretarijat Energetske zajednice pokrenuo je ranije spor, zbog odluke Vijeća za državnu pomoć Bosne i Hercegovine od 23. jula 2018., koja podrazumijeva da garancija ne uključuje bilo kakvu državnu pomoć, donesena suprotno važećim pravilima Energetske zajednice.

“Sekretarijat zahvaljuje Hermanu Verbistu, posredniku kojeg je imenovao Centar za rješavanje sporova i pregovaranje, na velikoj predanosti pregovaračkom procesu i izvršnim službama za olakšavanje”, saopćeno je.

Treba dodati da je Sekretarijat Energetske zajednice prošlog mjeseca objavio izvještaj u kojem se konstatuje da je Bosna i Hercegovina, kada je riječ o Zapadnom Balkanu, najviše kršila zakon kada je riječ o zaštiti okoliša i državnoj pomoći.

Riječ je o devet slučajeva u kojima se krši zakon po ovom pitanju, navode iz Energetske zajednice. BiH po ovom pitanju prednjači, a slijede je Ukrajina i Srbija sa pet kršenja zakonskih propisa.

“U velikom broju slučajeva Vijeće ministara Energetske zajednice utvrdilo je ozbiljno i uporno kršenje Ugovora o Energetskoj zajednici, ali ta neusklađenost nije otklonjena. To često uključuje pitanja koja su od presudnog značaja za razvoj energetskog tržišta jedne zemlje u skladu s evropskim energetskim zakonom, Bosna i Hercegovina uporno demonstrira neuspjeh da ispuni Treći, pa čak i Drugi energetski paket”, objasnio je zamjenik direktora Energetske zajednice Dirk Buschle.

Uprkos kritikama, domaće vlasti početkom novembra počele su sa pripremama za izgradnju Bloka 7.

Prema potpisanom Ugovoru sa kineskim investitorom vrijednost projekta je skoro 18 miliona KM bez PDV-a. Pored toga, postoji i jedan dio ugovora koji je izuzet od kineskog dobavljača, u vrijednosti od 63 miliona eura, koji će biti ponuđen domaćim kompanijama.

Realizacija najveće poslijeratne investicije u Bosni i Hercegovini planirana je 56 mjeseci.



Energetska zajednica: Prekinuti pregovori sa FBiH o izgradnji elektrane u Tuzli

Krajem 2024. godine predviđena je finalizacija projekta, a u toku 2025. Blok 7 trebao bi biti priključen na energetske sistem BiH, što će osigurati energetske efikasnost našoj zemlji za 50 godina.

Izvor: slobodnaevropa.org